

Dithero tsa Tirelano mo Kutlwanong

38/2014 Ka Sontaga 04 morago ga moletlo wa Modimo o o Borarobongwe, e le ka 13. 07. 2014

MO LEINENG LA MODIMO O E LENG RARA LE MORWA LE MOWA O O BOITSHEPO!

1. Sefela sa 155 - 138/139
2. **Thapelo:** Modimo, Rara, Mong-wa-bopelotlhomogi jotlhe, re a go leboga, gonne o re utlwetse - rona baleofi - botlhoko, o re baakanyeditse boitshwarelo ka Mopholosi wa rona Jesu Keresete. Bula dipelo tsa rona gore re dumele tse re di diretsweng ke wena, ka go re ruanya le wena, rona ba re neng re senyegile ka fa tlhagong ya rona ka go sa go itse, ka kilano, tumano, tlhoano. O re abele mowa wa go itshwarelana, re golele mo thatong e e boitshepo ya gago, re go utlwe, re nnele ruri mo go wena mo kagisong ka ntlha ya ga Keresete. Amen.
3. Epistolo ka fa thulaganyong ya 2 e kwadilwe mo go Baroma 14:10-13;
Efangele ka fa thulaganyong ya 1 e kwadilwe mo go Luka 6:36-42.
4. A go ipolelwe tumelo ya bokeresete!
5. Sefela sa 282 - 264/-
6. Thapelo ya mmadi wa thero.
7. Epistolo ka fa thulaganyong ya 6 e kwadilwe mo go Baroma 12:17-21, e re: "Se busoloseng bosula jwa ga ope ka bosula; gopolang tse di molemo mo bathong botlhe. Fa go kgonega ka fa thateng ya lona, agisanyang le batho botlhe. Baratwi, lo se ka lwa ipusolosetsa, mme sutelang bogale jwa Modimo; gonne go kwadilwe ga twe: 'Pusoloso ke ya me, nna ke tla busolosa, go bua Morena.' 'Jesa mmaba wa gago, fa a tshwerwe ke tlala; mo nose, fa a nyorilwe; gonne ka go dira jalo o tla tlhatlaganya magala a molelo mo tlhogong ya gagwe.' O se ka wa fenngwa ke bosula, mme fenya bosula ka molemo." Amen.

8. Thero: Phuthego ya Morena Jesu, kgalefo e tlile mo mefutafuteng yotlhe ya batho go nna tsa lefela, le fa bangwe ba sa rate go supa kwa ba galefetseng teng. Kwa kgalefo e tlileng teng, go bonala mowa o o kwa tlase. O rata go fitlhega. Ba bangwe ba phanyega, gongwe ba phunyega jaaka dinawa tsa ditlhobolo, ba bangwe ba fetoga mmala, ba le ba bahibidu, ba tshwana le tshipi e teku, ba roroma, ba tetesela ka bogale. Ba bangwe ba fetoga go nna disusu, ba didimala, ba re: Du fela; ba bangwe ba supa, le go bontsha tenego ya bone ka ditshupo tse di farologanyeng ka ntlha ya kgobo, gongwe kgobololo e ba e galefelang.

Motho mongwe le mongwe o tshwanetse go dira sengwe ka ntlha ya kgalefo ya gagwe, go ka nna gore a galefele, le fa e le eng, bogolo fa kgalefo ya gagwe e mo gogela mo boleong jo bo maswe. Ka moo Jakobo o kwadile a re: "A motho ... a iketle go galefa. Gonne bogale jwa motho ga bo dirafatse tse di siameng fa pele ga Modimo," Jak. 1:19-20. Re tshwanetse go ithuta go iketla go galefa, gonne maungo a bogale ke go leofa, le go siamolola, ke a a tswang mo nameng, ga se maungo a boitshepo jwa Modimo.

Kgalefo ke kotsi. E fetoga go nna mmusi wa pelo, e tsala pelo e e bosula le mowa o o sa rateng go itshwarelana. Pheleletso ya tseo ke go atlholwa ke Modimo. Ka kotsi eo re tlhagelediwa mo go Matheo 6:15 ka gore "Fa lo sa itshwarele batho ditlolo tsa bone, Rraeno le ene ga a kitla a lo itshwarela ditlolo tsa lona." Jesu o bua ka go tshwana le ka ga kang ya dikeletso tse di bosula, a re: Fa re sa lwe le dikeletso tse di bosula, ga re ka ke ra bona legodimo. Fa re sa itshwarele, ga re ka ke ra tsena mo legodimong, Math. 5:29; 6:16. Ga a bue jalo gore ba ba ikwatlhaelang maleo a bone, ba belaele ka boitshwarelo jo bo solofeditsweng ka go dumela mo go Keresete, mme o batla gore badumedi ba gagwe ba itise ka metlha gore ba se tlole ditaolo tsa gagwe.

Jesu o kaela ka thanolo ka gore mowa o o sa itshwareleng o gogela mo tatlhegong. Ka moo o lemoge gore mowa o o bosula o tsamaelana le go sa dumele. Ka moo ke tshwanelo gore re lwe le go sa dumele, jaaka re lwa le mowa wa pelo e e bosula, wa go galefa. Kwa re lwang ntwana eo, ga se go itwela ntwana ya rona e e tla re tsenyang mo legodimong, mme ka ntwana eo re ngaparela mo tumelong ya Lefoko la Modimo, re lebelele ka metlha ditsholofetso tsa bopelotlhomogi jwa ona.

Ntwa ya go lwa le pelo e e bosula le kgalefo e a batlega. Go diragala jang? Sa ntlha go diragala kwa thata ya Modimo e tla mo go rona ka Lefoko la ona, kwa Modimo o golola pelo ya rona mo boleong jwa kgalefo le mo pelong e e bosula, re nne ba ona, re agisanye sentle, re nne basupi ba boitshwarelo jo re itshwaretsweng ka jona, le kagiso ya Modimo ka go itshwarelana le ba bangwe ba ba re leofetseng.

Re tshwanetse go godisa go itshwarelwa ga rona ke Modimo gore re kgone mo ntweng eo ka phenyo. Paulo a re: "Tsholanang ka bopelontle, lo utlwelane botlhoko, lo itshwarelane, jaaka Modimo le ona o lo itshwaretse ka Keresete," Baef. 4:32. Boitshwarelo jo re bo amogelang jo bo tswang mo Modimong ka ntlha ya ga Keresete ke thata e kgolo e e re kgarametsang gore le rona re itshwarele ba bangwe, re se tshware pelo e e bousla, mme re nne bopelontle mo go bone. Ka tumelo e re nang le yona re a amogela gore re itshwarelwe ke Moatlhodi yo mogolo. Ka kitso eo re a itse gore ga go na molato o o sa ka keng wa itshwarelwa, mo go ba ba re leofetseng ga go na o mogolo o o fetang o o phimotsweng ke Modimo mo go rona. Boitshwarelo jwa ona bo re abela boitsheko le boitshepo ka tiro ya bopleotlhomogi jwa ona ka ntlha ya ga Keresete.

Sa bobedi go a diragala gore re lwe le mowa wa kgalefo ka go o fenya, fa re dumela. Re tshwanetse go dumela gore tshiamo ya Modimo ke yona e e nnelang ruri. Mowa oo wa kgalefo le bosula jwa ona o dirwa ka go itse gore go na le motho yo o re leofetseng ka go bua maaka ka ga rona, ka kutso, ka boikanyologo bongwe, ka go re nyatsa le go re senyetsa leina. Re ne re tlwaetse go gopola gore ba ba re diretseng tseo, gongwe jang, ba tshwanetse go bediwa. Ba ne ba sa tshwanela go re direla jalo. Re jewa ke bogale ka mo teng gore re galefe, re ineele go ipusolosetsa. Ga re batle go kokobediwa ke ba ba re direlang masula ale. Re batla go ba siamisa, le go ba baakanya.

Le fa go ntse jalo, Modimo ga a itumelele tseo. Ga o itumele, gonne boipusolosetso bo tswa mo go sa dumeleng, bo ganetsanya le boammaaruri jo bo reng: Ke tshiamo ya Modimo e e batlegang ka metlha. Paulo a re: "Baratwi, lo se ka lwa ipusolosetsa, mme sutelang bogale jwa Mdoimo; gonne go kwadilwe ga twe: 'Pusoloso ke ya me, nna ke tla busolosa, go bua Morena,'" Baroma 12:19.

Modimo o solofeditse gore ona ka boene ke Moipusolosi ka boammaaruri jwa ona mo boleong bongwe le bongwe. Tshiamo ya ona ga e palege. Ga go na boleo jo go tla

phologang mo boipusolosong jwa ona. O bona boleo le bosula jwa jona go feta ka fa re bo bonang ka teng. O ila boleo thata go feta kilo ya rona ya go bo ila. Ke ona o o nang le tshiamelo go busolosa. Ke o o tla re busolosetsang bosula jotle jo re bo direlwang ke ba bangwe. Ga go tlhokege gore re ipusolosetse.

A re o a amogela, fa e le o o re busolosetsang? A re dumela gore ke ona o o tla re abelang, le go re direla tse re di tlhokang. Fa go ntse jalo, Paulo a re: Re tla tlogela go ipusolosetsa, re tla tlogela go gopolela ba ba re leofetseng bosula. Re tla neela tsotle tseo mo diatleng tsa Modimo. Ke fa re tla baakanngwa, le go gololwa go busetsa bosula jo re bo diretsweng ka molemo. Ke go fenya bosula ka molemo, re rate baba ba rona, re tshegofatse ba ba re direlang bosula, Baroma 12:14.20.

Ga go na motho yo o leofetsweng mo go maswe jaaka Jesu. Ga go na yo o nyaditsweng, le go sotliwa jaaka Jesu. Ga go na yo o siamololetsweng, le go latlhwa jaaka Jesu. Gape ga go na ope yo o neng a se na molato jaaka ene. Jaanong, ke ka eng se se dirileng ene yo e leng Modimo gore a nyadiwe, le go latlhwa mo go kalo? Mo nyatsegong ya gagwe le go tlogelwa ke Rraagwe, kwa a neng a sa tshole a tshwana le motho, o ne a ikanya Rraagwe gore o tla mo atlholela ka tshiamo.

O ne a kopa Rraagwe, a mo kopa, e le motho jaaka rona. A tiisa gore pusoloso ke ya Modimo, Rraagwe, a ikanya gore tshiamiso ya Modimo ke e e nnelang ruri. Jaaka Modimo e le Mmusolosi yo o tla re busolosetsang, re gololesegile ka go nna mo go ona rona ba re leofetsweng ke dipelo tse di bosula le kgalefo, re nne mo go ona ka tsholofelo gore re itumedisediwe ke ona ka go re femela, le go re boloka.

Jesu o nyaditswe, le go sotliwa ke bone ba ba mo galefetseng, ba na le dipelo tse di bosula, nyatsego ya gagwe e re tliseditse boitshwarelo, le go amogelwa ke Modimo. Boitshwarelo jwa ga Rraagwe jwa bonala mo go Jesu gore ba ba dumelang mo go ene ba nne le kabelo mo go jona le bone. Ka moo, fa re lebagana le bogale jwa batho le jwa Modimo, re bolelelwa fano gore Rara o rata go dira gore re nne le bopelokgale mo tsholofelong le mo boikanyong. O re direla ka go re bontsha tiro e kgolo ya ga Jesu yo o sikareng bogale mo boemong jwa rona. Bosula bo busediwe ka molemo, jaaka go kwadilwe mo go 1 Petr. 1:6-7

Modimo o re itshwaretse. O re diretse ka bopelonomi. Ke ona o o tla re busolosetsang mo go bone ba ba re leofelang. Le fa re tshwenyega mo go maswe ka ntlha ya ba ba re

galefelang, Modimo o tla re busetsa ka molemo e nne Mmusolosetsi wa rona, o re utlwele botlhoko mo boleong jwa go galefa, o re itshwarele ka ntlha ya ga Keresete. Amen.

9. Thapelo: Jesu Mopholosi wa rona, re lebogela dithapelelo tsa gago tsa go re kopela mo go Rrago ka ntlha ya go leofa ga rona. Re lebogela pelo ya gago e e nang le bopelonomi jo bontsi mo boemong jwa boipusoloso. O re itshwarele ka bopelotlhomogi jwa gago, Morena, bogolo kwa re eletsang go ipusolosetsa ka thata ya rona o re rute go go ikanya le Rrago, yo e leng Rraetsho. Re a kopa gore o tswellele ka metlha go re femela mo moraeding, le mo go botlhe ba ba eletsang go re leofela ka go re gogela mo moweng o o bosula. O re direle jalo ka ntlha ya bopelontle jwa gago. Amen.

Thapelo ya Morena: Rara wa rona yo o mo legodimong ...

10. Sefela sa 299 - 274/280

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke M. N. Mntambo ka ngwaga wa 2008/2014

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.